

西夏紀事本末

三十六卷

光緒乙酉
刻于金陵

叢書集成續編 第二七六冊目錄

史地類



宋紀事本末

西夏紀事本末三十六卷首一卷(二) (卷十四至卷三十六) 清 張鑑撰 半 厂 一

宋別史

東都事略校勘記一卷 清 錢綺撰 適 園 七三

東都事略校記一卷 民 繆荃孫撰 適 園 八五

宋稗史

曾公遺錄殘三卷(存卷七至卷九) 宋 曾布撰 藕 香 一一一

使遼語錄一卷 宋 陳襄撰 遼 海 二一九

偽齊錄二卷 宋 楊堯弼撰 藕 香 二二七

使金錄一卷 宋 程卓撰 芋 園 二四九

中興政要一卷 宋 不著撰人 振綺堂 二六一

錢塘遺事十卷 清 文廷式輯 振綺堂 二六一

宋稗史

中興戰功錄一卷(又名十三處戰功錄一卷) 宋 李壁撰 藕 香 三四三

靖炎兩朝見聞錄二卷 宋 陳東著 芋 園 三五七

開禧德安守城錄一卷……………宋 王致遠撰 永 嘉 四〇七

宋史考

舊聞證誤補遺一卷……………宋 李心傳撰 藕 香 四二九

宋史評

經幄管見四卷附校勘記一卷……………宋 曹彥約撰 胡氏豫章 四三七

南宋宮閨雜詠一卷……………清 趙 棻撰 武林掌故 四八一

遼碑史

遼紀一卷……………明 田汝成撰 遼 海 四九七

遼小史一卷……………明 楊循吉撰 遼 海 五一五

金碑史

松漠紀聞一卷續一卷補遺一卷附考異一卷校勘記一卷……………宋 洪 皓撰 胡氏豫章 五二五

金小史八卷……………明 楊循吉撰 遼 海 五五一

金史論

吉貝居雜記一卷……………清 施國祁撰 雪 堂 五八一

史論五答一卷……………清 施國祁撰 湖 州 五九一

元正史

元史本證五十卷末一卷（卷一至卷三十四）……

清 汪輝祖撰
清 汪繼培補

紹興先正 五九九

西夏紀事本末卷十四

烏程張鑑春治甫著

渭川之變

慶曆元年韓范既各以事去夏四月甲申以陳執中同陝西安撫經略招討使曹瑋副之時夏竦判永興軍執中知軍事議多異同故分命竦屯鄜州執中屯涇州竦雅意在朝廷及任以西事頗依違顧避嘗出巡邊置侍婢中軍帳下幾至兵變竦又嘗揭榜塞上云有得趙元昊頭者賞錢五百萬貫爵爲西平王元昊使人入市賣箔陝西荻箔甚高倚之食肆門外併爲食訖故遺去之至晚食肆竊喜以爲有所獲也徐展之乃元昊購竦之勝懸箔之端有云得夏竦頭者與錢兩貫比竦聞之急令藏換而已宣播遠近矣竦大慚沮其見輕侮如此初劉石之敗陳瑋請籍民爲義軍以張兵

卷十四

勢于是料簡鄉弓手數萬人賊寇山外還天都卻儀秦屬戶琮發騎士設伏以待之賊遂引去琮欲誘吐蕃犄角圖賊得西州舊賈使諭意而沙州鎮國王子遣使奉書願率首領爲朝廷擊賊帝善琮策故使副執中五月戊午以右班殿直趙珣爲陝西經略安撫招討都監珣初隨其父振在西邊訪得五路徼外山川邑居道里利害作聚米圖經五卷韓琦言于帝詔取其書并召珣至又上五陣圖兵事十餘篇帝給步騎使案陣既成臨觀之于是陳執中薦珣爲沿邊巡檢使呂夷簡宋庠共奏用兵以來策士無如珣者即擢任之珣自以年少新進未有功辭都監受兵萬人賜御鎧復自擇偏裨參居涇原兼治籠竿城麻璫党留百餘帳處近塞爲暴珣白府引兵三萬自靜邊歷探吳抵木窰襲賊俘獲數千計靜邊將劉滬後爲賊所掩珣登阪望見縱騎數百復又拔滬之眾以出土

卷十四

二

皆歎服六月壬辰詔陝西諸路總管司嚴邊備毋輒入賊界賊至則禦之秋七月丙辰月掩心後星戊午月掩南斗元昊寇麟府二州折繼閔敗之八月戊寅詔鄜延部署許懷德等以兵萬人援麟府麟州言元昊破寧遠砦皆主侍禁王世宣兵馬監押殿直王顯死之焚倉庫樓櫓皆盡復率兵攻府州州城險且堅東南谷有水門厓壁峭絕下臨大河賊緣崖腹微徑魚貫而前城上矢石亂下賊死傷殆盡轉攻城北士卒復力戰傷者千餘人賊乃引退縱兵四掠又復圍豐州麟府二州皆在河外因山爲城最爲險固而麟扼西夏之衝但城中無井唯有一沙泉在城外其地善崩俗謂之抽沙每欲包展入壁而土陷不可城初河東轉運使文洎以麟州餉道回遠軍食不足欲按唐張說出兵故道復通河關未及就而卒及洎子彥博爲河東轉運副使遂通道銀城而州有積粟可守然其無水如故也至是有戎人謂元昊曰麟州無井若圍之半月卽兵民渴死矣元昊卽以兵圍之數日不解城中素乏水圍既久士卒渴乏城中大窘有軍士獻策於知州苗繼宣曰彼圍不解必以無水窮我今願取溝泥使人乘高以泥草積飾陣使賊見之亦伐謀之一端也州將從之元昊仰視曰謀謂我無庸戰不三日漢人當渴死今乃有泥以護草積是給我也斬之城下解圍而去乙未元昊圍豐州孤城無援遂陷知州王餘慶權兵馬監押孫吉指使侯秀死之九月庚戌以張亢爲并代鈐轄管勾麟府軍馬公事時元昊已破豐州引兵屯琉璃堡縱騎抄麟府開二州閉壁不出民乏水飲黃金一兩易水一杯亢單騎扣府州城門關不啟亢曰我新軍馬也出所受敕示城上旣入卽開門縱民采薪芻汲滿谷然賊騎猶時出抄掠漢田亢以州東焦山有石炭穴爲築東勝

堡下城旁有蔬畦爲築金城堡州北沙坑有水泉爲築安定堡置兵守之募人獲於外腰鑲與持兵衛送者均其得時禁兵敗北無鬪志乃募役兵夜潛隘道邀擊賊遊騎比明或持首級來獻亢犒勞之衣以錦袍禁兵始暫奮曰我顧不若彼乎又縱使飲博士窘乏幸利皆願一戰亢知可用始謀擊琉璃堡使謀伏賊寨旁草中見老羌方炙羊腩占吉凶驚曰明日當有急兵且趨避之皆笑曰漢兒方藏頭却開何敢至此亢知無備夜引兵襲擊大破之斬首二百餘級賊棄堡遁去乃築宣威寨于步駝溝捍寇路然賊自是攻城寇括不已時將校張崑等戰比有功名振一軍卒皆不至顯官以鄜延都監王信爲本路鈐轄兼兩路都巡檢使信初爲鄜延都監始至之夕賊眾數萬傳城軍吏氣懾不知所爲信領勁兵二千夜出南城門與賊戰不利失其前鋒因按軍不動遲明潛上

卷十四

三

東山整軍乘勢而下擊走之追襲大獲而還葛懷敏敗信又出兵拒賊俘斬甚眾先是屯田員外郎河內張旨通判府州州俯山無外城旨將築之州將曰吾州據險敵必不來旨不聽城垂就寇大至乃聯巨木補其罅守以強弩州無井賊斷河飲路旨夜開門擊賊少卻以官軍壁兩旁使民出汲復以渠泥覆草積督居民乘城力戰賊死傷者眾遂解去壬申遷旨都官員外郎鄜州都監王凱數破賊有功賊圖麟州乘城拒鬪晝夜三十一日始解去累遷麟府路沿邊都巡檢使與同巡檢府谷張岳護糧道于青眉浪賊大至與岳相失乃分兵出其後夾擊之復與岳合斬首六十五級又入兔毛川遇賊眾三萬凱以兵六千陷圍流矢中面鬪不解至暮賊潰又斬首百八十六級自蹂踐死者以數千遷南作坊副使時元昊遣兵分屯要害以絕麟州餉道楊偕請棄河外保合河津帝

不許會管勾麟府軍馬事張亢擊賊琉璃堡破之又戰于柏子砦及兔毛川皆勝癸酉降并代副署王元鈴轄康德興桐懷志等官先是賊圍府州德興等寨兵不出但移文轉運副使彥博藉民輦運至境以俟德興終不敢出及豐州陷才出屯州城外數里三日而還居民望見以爲寇復至皆棄其所齎入保城郭彥博以其事聞故責及之然止坐不出戰其它則朝廷不悉聞也 冬十月命知并州楊偕速修復靈遠寨遂築建寧等五堡十餘柵以援麟州河外始固甲午夏疎陳執中罷分秦鳳涇原環慶鄜延爲四路以韓琦知秦州王沿知渭州范仲淹知慶州龐籍知延州各兼經略安撫招討使詔分領之自元昊反延州陷金明承平塞門安遠柵柵寨破五龍川城砦焚掠殆盡籍至稍葺治之戍兵十餘萬無壁壘皆散處城中畏籍嚴無敢亡去金明西北有渾州川其土平沃

卷十四

四

川尾曰橋子谷爲敵出入之路募民耕植得粟以濟軍又使周美襲取承平砦王信築龍安砦悉取虜所據地築清水等十一城延民以安初元昊陰誘屬羌爲助環慶酋長六百餘人約爲嚮導後雖首露猶懷去就仲淹以其反覆不常至部即奏行邊以詔書犒賞諸羌聞其人馬爲立條約諸羌皆受命自是爲中國用羌人親愛之呼爲龍圖老子仲淹以慶州西北馬鋪砦當後橋川口南通鳳州華州池北接白豹金湯種落彊悍而善耕且在賊腹中欲城之度賊必爭密遣其子純佑與蕃將趙明先據其地一日擁兵出諸將隨之不知所向行至柔遠始號令告其地處所往至于版築之用大小畢具旬日城成即大順城也賊覺以三萬騎來戰佯北仲淹戒勿追已而果有伏大順既成而白豹金湯皆不敢犯環慶自此

寇盜益少詔賜名曰大順城環州屬羌明珠滅二族兵各萬餘人皆附賊仲淹又請復細腰城葫蘆泉諸砦招致二族以扼賊又復近羌千三百餘帳葛懷敏之敗定川也關中民竄匿山谷乃率部下兵赴援而募兵關中人心始安仁宗聞定川之敗頗以西方爲憂謂近臣曰若得仲淹出援涇原可無慮矣及聞其出師甚喜仲淹在邊以長子純佑爲監簿純佑自幼警悟明敏過人時年方冠與諸將卒錯處鉤深摘隱得其材否仲淹所料事純佑必先知之人或言純佑善能出神凡虜情幾事皆預遙知蓋出神之虜廷得之仲淹每制勝料敵如神者純佑之力也自後出神爲人所驚故神觀不足未幾而亡年亦甚少

二年春一月仲淹巡邊知環州屬羌多密與元昊相通以种世衡素得屬羌心而青澗城已完乃奏徙世衡知環州以鎮撫之詔從

卷十四

五

其請有牛奴訛者素倔強未嘗出見州官聞世衡至乃來郊迎世衡與約明日當至其帳慰勞部落是夕大雪深三尺左右言奴訛因詐難信且道險不可行世衡曰吾方以信結諸羌可失期耶遂緣險冒雪而往既至奴訛尙臥大驚起曰吾世居此山漢官無敢至者公了不我疑耶帥部落羅拜曰今而後惟公所使皆感激心服又有兀二族受賊僞職世衡遣人招之不至命蕃官慕恩出兵討之其後百餘帳皆自歸戊子降詔獎諭知延州龐籍等以興修橋子谷寨成也夏五月癸卯朔徙張亢爲高陽關鈐轄初麟州猶未通饋路開隔敕亢自護南郊賞物送麟州賊既不得抄隨以兵數萬趨柏子寨邀我歸路亢所將才三千人亢激怒之曰若等已陷死地前鬪則生不然爲賊所屠無餘也士皆感厲會天大風順風擊之斬首六萬餘級奪馬千餘匹乃修建寧寨賊數出爭遂

戰于兔毛川亢自以大陣抗賊而使驍將張岢以短兵彊弩數千伏山後亢以萬勝軍皆京師新募疲爽不能戰賊目曰東軍素易之而虎翼卒勇悍陰易其旗以謀賊賊果趨東軍而值虎翼卒搏戰良久發伏賊大潰斬首二千級不踰月築清塞百勝中候建寧鎮川五堡麟州路始通朝廷慮遼渝盟徙亢高陽是月范仲淹城白豹金湯秋閏九月辛未朔先是元昊聲言入寇攻鎮戎軍王沿命副總管葛懷敏督諸砦兵禦之已卯至瓦亭寨遣本寨都監許思純環慶都監劉賀以蕃兵五千餘人爲左翼天聖寨主張貴爲殿後戊子進屯五谷口知鎮戎軍曹英涇原路都監趙珣西路都巡檢李良臣孟淵皆自山外來會沿邊都巡檢使向進劉湛爲先鋒趙瑜總奇兵爲援及大軍次安邊寨給芻秣未絕懷敏卽離軍夜至開遠堡北一里而舍庚寅領大軍自鎮戎軍西南又先引

卷一四

六

從騎百餘以前走馬承受趙政以爲距賊近不可輕進懷敏乃少止晚趨養馬城曹英及涇原都監李知和王保王文鎮戎都監李岳西路都巡檢使趙璘等分兵屯鎮戎城西六里夜則入城自守凡三日至是亦趨養馬城見懷敏聞元昊徙軍新濠外乃議質明掩襲趙珣謂懷敏曰賊遠來利速戰宜依馬欄城布柵扼賊歸路固守鎮戎以便餉道俟其衰擊之可必勝不然必爲賊曹所屠懷敏不聽命諸將分四路趨定川劉湛向進出西水口趙珣出蓮花堡曹英李知和出劉璠堡懷敏出定西堡既而知和與英督軍夜發辛卯劉湛向進行次趙福新堡遇賊戰不勝保向家峽而趙珣曹英李良臣孟淵等將趨定川懷敏且令援趙福堡未行謀言賊已屯邊壕上復召珣等入定川會李知和麾下蕃落將報賊五千入列定川寨北頃之王文李知和定川寨主郭綸又報已拔柵踰

壕懷敏命趙珣與其子宗晟先行日幾午懷敏入保定川寨賊毀版橋斷其歸路別爲二十四道以過軍環圍之又絕定川水泉上流劉賀率蕃兵關於河西不勝眾潰懷敏爲中軍屯寨門東偏曹英等陣東北隅賊四面俱至先以銳兵衝中軍不動回擊曹英會黑風自東北起部伍相失陣遂擾士卒攀城堞爭入英面被流矢仆壕中懷敏所部兵見之亦奔駭懷敏爲眾所擁蹂躪幾死與至襄城久之乃蘇懷敏選士據門橋揮刀手以拒入門者趙珣等擁刀斧手前關及以騎軍四合禦賊賊眾稍卻然大軍無鬪志趙珣累馳入勸懷敏還軍中是夕賊大聚圍城四隅臨西北呼曰爾得非部署廳上點陣圖者邪爾固能軍乃入我圍中今將何往夜四鼓懷敏召諸將計議莫知所出遂謀結陣走鎮戎軍趙珣請自籠竿城往彼無險且出賊不意眾不從及旦懷敏束馬東南馳二里

卷一

七

許至長城壕路已斷賊周圍之懷敏及諸將曹英等十六人皆遇害軍士九千四百餘人馬六百餘匹悉陷于賊懷敏子宗晟與郭京等還保定川時韓質等領軍數千保蓮花堡劉湛等領軍一千保向家峽皆不赴援于是賊長驅直抵渭川幅員六七百里焚蕩廬舍屠掠居民而去邠涇以東皆固壘自守時天陰晦者十日人情慘沮范仲淹自將慶州兵來援知涇州滕宗諒大設牛酒犒迎于是士卒感發邊民稍安自劉平敗于延州任福敗于鎮戎懷敏敗于渭川敗聲益振然所以復守巢穴者蓋邠延路屯兵六萬八千環慶路五萬涇原路七萬秦鳳路二萬七千有以牽制之故也事聞時呂夷簡復居相位語人曰一戰不及一戰可駭也冬十月贈涇原路副都署葛懷敏官諡忠隱涇原鈐轄曹英以下十六人亦並贈官有差十一月壬申黑氣貫北斗辛巳以韓琦范仲淹

屬籍爲陝西安撫經略招討使置司涇州會仲淹附王懷德入秦乞與韓琦同經略涇原並駐涇州琦兼秦鳳臣兼環慶涇原有警臣與琦合秦鳳環慶之兵犄角而進若秦鳳環慶有警亦可率涇原之師爲援臣當與琦練兵選將漸復橫山以斷賊臂不數年可期平定願詔屬籍兼領環慶以成首尾之勢秦州委文彥博慶州用滕宗諒總之渭川一武臣足矣帝采其策琦與仲淹在兵間久名重一時人心歸之朝廷倚以爲重二人號令嚴明愛撫士卒諸羌來者推誠撫接咸感恩畏威不能輒犯邊境邊境人爲之語曰軍中有一韓西賊聞之心膽寒軍中有一范西賊聞之驚破膽是冬元昊求納款請歲入烏白池青白鹽十萬石售於縣官不許先是种世衡不利於定州以仲淹爲領兵援初關右人心搖動及見仲淹耀兵號令整飭人心遂安相賀曰邊上自有龍圖公爲長

城吾屬何憂

卷十四

八

西夏紀事本末卷十五

烏程張鑑春治甫著

二廂被開

慶曆元年夏六月詔西邊嚴備初陝西經略判官川況上兵策十四事有曰賊將野利剛浪陵遇乞之徒分廂主兵皆近漢界出入從者不過一二人若能陰募死士陷其首去賊之手足但朝廷不惜美官重賂則功豈難圖

三年春正月种世衡已自青澗知環州乃設開始元昊分山界戰士爲二廂命兩將統之野利統明堂左廂遇乞統天都右廂二將能用兵山界人戶善戰元昊倚爲腹心中閒劉平石元孫任福葛懷敏之敗皆二將之策也方种世衡在青澗時即謀有以去之有悟空寺僧光信者青澗人本姓王落魄耽酒趨勇善射習知虜中

卷十五

山川邊人謂之王和尚多往來蕃部中世衡察其堅樸誘令冠帶因出師以賊級予之白於帥府使爲嚮導授三班借職充經略司指使且力爲辦其家事凡屋室騎從衣食之具悉出世衡光信感恩既深一日世衡忽怒謂光信曰我待汝如此而陰與賊連何相負也拽下械係極楚極其苦楚凡一月濱於死者數矣光信終不伏曰光信丈夫也公聽奸人言欲見殺則死矣終不以不義自誣毅然不顧雖不勝其苦卒無一詞怨望世衡知可任事居半年召光信謂之曰吾將以事使汝吾戒汝所不言其苦雖有甚于此者汝能爲卒不言否光信泣對曰蒙將軍恩教致身榮顯常誓以死報而未知其所況敢辭垂楚乎世衡乃草遺野利書書詞大抵如世閒問起居之儀惟以數句隱詞如嘗有私約而勸其速行之意於尺素且膏以蠟臨發復召飲之酒而謂曰塞外苦寒吾爲若納

卷十五

一襖可衣之以行回日當復以歸我因置書於襖間密緝之告光信非濱死不得洩如洩之當以負恩不能成吾事爲言并以畫龜一幅棗一部爲信俾遺野利光信受教始及出界卽爲邏兵所得送野利處致世衡命出棗龜投之野利知見侮笑曰吾素奇种將軍今何兒女子見識度光信別有書光信佯目左右旣而答以無有野利不敢匿乃與光信自所治以歸元昊鎖光信囚于地牢數日元昊召野利與光信俱西北行數百里至一大城曰興州先詣一官寺曰樞密院曰中書有數胡人雜坐野利與焉召光信廷詰世衡書問所在光信堅執前對稍稍去巾櫛加執縛至于捶楚極苦光信終不易其言又數日召入一官寺廳事廣楹皆垂斑竹箔綠衣小豎立其左右光信意以爲元昊宮室也少頃箔中有人出又以前問責之曰若不速言死矣光信對如前遂縛光信拷掠千餘至脇以兵刃光信終言無它乃命曳出誅之光信大號且言曰始將軍遣光信密遺野利王書戒不得妄洩今不幸空死不了將軍事吾負將軍吾負將軍軍中急使人追問之光信具以對乃褫其襖取書以進書入移刻始命光信就館優待以禮元昊於是疑野利陰遣愛將假爲野利使使于世衡世衡知元昊所遣未卽見命屬官曰館勞之問虜中山川地形其在興州左右者言之則詳在野利所部多不能悉適擒生虜數人因令隙中視之生虜能言其姓名果元昊使世衡意決乃見之使者傳野利語世衡謾罵元昊而稱野利有心內附乃厚遣使者曰爲吾語若主速決毋遲留也使者歸元昊大怒自此奪野利之兵旣又殺之世衡知謀已行因并欲閒遇乞遇乞者又嘗爲元昊謀主守天都山號天都大王與元昊乳母白姥有隙會歲除日天都引兵巡邊深涉漢境數宿

白姥乘間乃譖其欲叛元昊疑之世衡嘗得蕃酋之子蘇吃曩厚遇之聞元昊嘗賜遇乞寶刀而吃曩之父得幸於天都世衡因使吃曩竊天都利刀許之以緣邊職任錦袍真金帶吃曩得刀以還世衡乃倡言天都已爲白姥譖死設祭境上爲祭文敘歲除日相見之歡多述天都與野利相結有意本朝悼其垂成其文書之於版雜紙幣中入夜乃火燒紙錢川中盡明虜見火光引騎近邊窺覘伺有虜至急點之版字不可遽滅乃佯委祭具而銀器凡千餘兩悉棄之虜人爭取器皿得元昊所賜刀及香鑪中見祭文已燼尙存數十字元昊得之又識其所賜刀遂賜天都死天都有大功死不以罪自此君臣猜忌至不能軍元昊既失二將久之始悟爲世衡所賣遂定講和之策鑑按此事長編載世衡長子古於皇祐元年詣闕訟父功爲屬籍所掩麗因爲沈氏筆談爲正光信後歸盡得虜中事以報朝廷錄其勞補右

卷十五

三

侍禁歸姓爲王崧後官至諸司使世衡又嘗以非罪怒一蕃落將杖其背僚屬爲之請莫能得其人杖已卽奔元昊元昊甚親信之得出入樞密院歲餘盡洞得其機事以歸眾乃知世衡用其爲間也羌酋有蘇息慕恩者部落最强世衡皆撫而用之嘗夜與慕恩飲出侍姬以佐之旣而世衡起入內潛於隙中伺之慕恩竊與侍姬戲世衡遽出掩之慕恩慚懼請罪世衡笑曰君欲之邪卽以遺之由是得其死力諸部有貳者使慕恩討之無不克及卒羌酋臨者數日青澗及環人圖其像而祀之上嘗降詔曰邊臣如此朕復何憂

西夏紀事本末卷十六

烏程張鑑春治甫著

曩霄受款

慶曆元年元昊雖數勝然死亡瘡痍者亦殆半人困於點集則力不給國中爲十不如之謠以怨之又誅殺不常肘腋數反終不能大斥境土而中國兵益練習名將稍出頗究知敵中情狀元昊始欲臣矣冬十月壬寅張方平疏今賊中尺布可直錢數百以此揣賊情安得不困十一月右正言吳育言元昊名爲藩臣其尺賦斗租不入縣官窮漠之外服叛不常且已僭輿服誇示酋豪勢必不能自削宜援國初江南故事稍易其名可以順撫而收之十二月密詔知延州龐籍招納元昊元昊苟稱臣雖仍其僭號亦無害若改稱單于可汗則固大善籍以爲元昊驟勝方驕若中國自遣

卷十六

人說之彼益偃蹇時西鄙用兵日久帝心亦厭之

二年秋閏九月知延州龐籍言夏境黃鼠食稼且天大旱元昊思納款詔命知保安軍劉拯諭元昊親信野利剛浪凌遇乞兄弟言公方持靈夏兵儻陰圖內附當以西平茅土分冊之野利剛浪凌遇乞者三人皆元昊黨有材謀剛浪凌即旺榮也親信用事時邊臣多欲以謀閒之會剛浪凌令浪埋賞乞媚娘等三人按東都事略謂三人未知孰是列名爲書詣知青澗城种世衡請降欲議罷兵以款我師世衡知其詐不若因以爲閒使悟空寺僧王光信至野利處語在二廂受閒紀事元昊于是頗疑其臣之貳已乃遣其教練都使李文貴以剛浪凌旨至青澗報世衡且言不達所遺書意豈欲通和乎用兵以來資用困乏人情實便于和世衡以告龐籍籍疑其詐留文貴青澗城數月賊果大入敗懷敏于定州于是

卷十六

二

籍自青澗召文貴至謂之曰汝之先王及今王之初皆不失臣節汝曹忽無故妄加之名使彼之民肝腦塗地皆汝羣下之故也我國家富有天下雖偏師小衄未至大損汝一敗則社稷可憂矣汝歸語汝王若能悔過稱臣朝廷所以待汝王者禮數必優于前文貴頓首曰此固西人日夜之願也籍乃厚贖使還報時元昊國中疲困欲納款而恥先言及文貴還具述籍意乃出王光信禮之甚厚使與文貴復持旺榮等書來抵籍議和籍嫌其言不遜未敢復書請于朝時朝廷厭兵且議招懷使籍以書許其和而稱旺榮爲太尉籍復請曰太尉天子上公使旺榮稱之則元昊不可得臣矣今其書自謂寧令或謾寧令皆虜中官稱于義無嫌詔從籍言既而旺榮等又以書來欲仍其僭號而稱臣納款籍曰此非邊臣所敢知也時方議修涇原城寨籍恐元昊敗其功故與往復計議不絕其請既而元昊仍使李文貴至延州議和然猶倔強不肯削僭號且云如日方中止可順天西行安可逆天東下籍以其言未可屈服乃報之此非邊臣所議宜遣人自請詔籍復許之三年春正月辛卯建渭州籠竿城爲德順軍用王堯臣議也初元昊反以堯臣爲陝西體量安撫使視四路山川險易還言某路宜益兵若干某路賊所不到某路宜急爲備至於諸將可用者二十餘人皆爲名臣堯臣已元昊知朝廷許和有緒乃遣僞六宅使伊州刺史賀從勛來納款先龐籍因李文貴還答旺榮書約以元昊自奉表削僭號始敢聞于朝廷于是文貴與從勛持元昊書至保安軍其書自稱男邦泥定國兀卒曩霄上書父大宋皇帝兀卒譯言即吾祖也但稱其新所改名曩霄而不稱臣從勛又致遊使人諭令早議通和之意又言本國自有國號無奉表體式其稱兀卒蓋

如單于可汗之類若南朝使人至本國坐蕃宰相上元卒見使人時離雲牀問聖躬萬福籍使謂之曰天子至尊荆王叔父也猶稱臣今名體未正不敢以聞從勛因請詣闕曰子事父猶臣事君也若得至京師而天子不許更歸議之籍乃具以問且言元昊詞稍順必有改事中國之心願聽從勛詣闕更選使者往其國申諭之彼必稱臣凡求丐之物當力加裁損時元昊與遣有徵故請款塞而當時議邊事者虛揣臆度迄不得其要領二月庚戌右正言梁適使延州與龐籍議所以招懷元昊之禮於是許賀從勛赴闕乙卯范仲淹韓琦言元昊如大言過望爲不改僭號之請則有不可許者三如卑詞厚禮從元卒之稱亦有不可防者三夏四月癸卯朝廷以元昊名分未正使僉署保安軍判官事邵良佐假著作郎與從勛至夏州更議之先是良佐與賀從勛詣闕館於都亭西

卷十六

三

驛承受使臣取元昊書至中書樞密院論從勛以所齎來文字名體未正名上一字又犯聖祖諱不敢進卻令齎回其稱男情意雖見恭順然父子亦無不稱臣之禮自今上表只稱舊名朝廷當行封冊爲夏國主賜詔不名許自置官屬其宴使人坐采殿之上或遣使往彼一如接見契丹使人禮如欲差人於界上承領所賜亦聽之置榷場于保安軍歲賜絹十萬匹茶三萬斤生日與十月一日賜資之許進奉乾元節及賀正其沿邊興復寨柵並如舊仍命良佐與從勛等往議之其大臣或謂良佐曰今茲用兵如富者與貧者賭博貧者只宜常勝使富者勝貧者必匱其不遜如此元昊又語眾曰我求罷兵而南朝不許用此以歸怨激眾秋七月乙酉元昊復遣如定聿捨等與邵良佐俱來所要請凡十一事其欲稱男而不爲臣猶執前議也歐陽修言問朝廷欲以殿中丞任顥

館伴元昊所遣來人間邵良佐昨來自彼僅免屈辱而還今元昊來人欲乞更不差官館待送置驛中不須急問至於監視饋餉傳道語言一了事班行足矣不從諫官蔡襄言元昊始以元卒之號爲請邵良佐還欲更號吾祖足見羌戎悖慢之意縱使元昊稱臣而上書自稱曰吾祖朝廷賜之書亦曰吾祖是何等語耶會鹽鐵判官任顥爲館伴一切折以大義使者詞屈八月元昊使辭羣臣班紫宸殿門以大理寺丞張子奭爲祕書丞與右侍禁王正倫使夏州冬元昊復遣其臣孫延壽等繼來議和及歲幣時元昊已稱臣而猶欲自賣買及以書幣通中國增歲賜至三十萬詔惟許置榷場於保安軍及高平若博易用牛羊馬駝氈褐禁青鹽生屬之部更不得侵犯增歲賜絹銀茶絲共二十五萬五千如欲於界上承所賜亦聽其議乃顥所陳者朝廷因元昊請和遂召韓琦范仲

卷十六

四

淹爲樞密副使命知永興軍鄭戡代之時元昊猶倚契丹邀索亡厭戡至巡邊至鎮戎軍趣蓮花堡天寒與將佐置酒高會元昊方擁兵近塞會暮塵起有報賊騎至戡曰此必諸將按邊回爾非賊騎也已而果然元昊謂其下曰我已遣人使稱臣朝廷何爲復用此公護諸將邪及疆事少寧卽還知永興而晏殊等厭兵將一切從之琦力陳不便帝嘉納之四年夏五月丙戌元昊始稱臣自號夏國主復遣其臣尹與則楊守素來議事且上誓表言兩國不通和好已歷七年邊陲屢經久敵今立誓之後其前掠奪過將校及蕃漢人戶各更不取索自今緣邊蕃漢人逃背過境不得遞相襲逐酬賽並逐時送還宥州保安軍無或隱避臣近者以本國城寨進納朝廷其係栲栳刀南安承平四處地分及他處邊境見今蕃漢人戶住坐之處並乞以

蕃漢爲界仍于本界修築城堡各從其便朝廷每年所賜絹一十三萬匹銀五萬兩茶三萬斤進奉乾元節回賜銀一萬兩絹一萬匹茶五千斤進奉賀正回賜銀五千兩絹五千匹茶五千斤每年賜中冬時服銀五千兩絹五千匹並賜臣生日禮物銀器二千兩細衣著一千匹伏乞無致改更臣更不以他事輒干朝廷只今本國獨進誓文不合亦乞領賜誓詔蓋欲世世遵承永以爲好儻君親之義不存臣子之心渝變使宗祀不永子孫受誅其誓表伏請藏于盟府先是韓琦范仲淹並對上四策曰元昊定川之戰作僞詔誘邊人欲定關中蓋漢多叛人陷於窮漠必以苻秦元魏事游說元昊使其侵取漢地而以漢人守之則富貴可如其意乃知非獨元昊志在侵漢實漢之叛人爲賊謀也其二曰元昊巢穴實在河外河外之兵懦而罕戰惟橫山一帶人馬精勁悅習戰鬪與漢

卷十六

五

界相附每入寇必爲前鋒請於鄜延環慶涇原路各爲三軍觀賊之隙使三軍互掠於橫山元昊若失橫山之勢可謂斷去右臂此攻策之得也至是諫官余靖亦言景德中契丹舉國深入先帝與之對壘河上止以三十萬通和今元昊解仇與物遂至二十六萬且元昊書其名雖順其詞甚悖自言通和之事非其本心今與物雖多豈敢撤備又契丹間元昊得物之數寧不生心凡元昊所求不宜盡許惟審計之不從是月鄜延經略司言西賊寇青澗城宣武副都頭劉岳等與之戰敗之九月元昊復遣楊守素來議事冬十月庚寅賜西夏詔曰勅省所進誓表事具悉朕臨制四海廓地萬里西夏之土世以爲昨今乃納忠悔咎表於信誓質之日月要之鬼神及諸子孫永無渝變申忱覆懇朕甚嘉之俯閱來誓一皆如約所宜明諭國人藏書祖廟自今以往永保安和十二月乙

未遣祠部員外郎張子奭等冊元昊爲夏國王更名曩霄其詞曰維慶曆四年歲次甲申十二月戊子朔二十四日辛亥皇帝若曰於戲昔夏后薄四海建方伯化克父安漢氏載甲令胙萬國德以長祿何則外爲余屏既有以效其績內信厥賞亦所以異其寵今茲錫命是焉稽古咨爾曩霄沈毅而敏靖恭以柔撫爰有眾保于右壤惟爾考一其心力服勤王事寵以書社光啟乃邦我國家歲時賚賜使介存恤著在盟府號爲懿勳洎爾承嗣率乃舊服向以稱謂非正疆候有言鄙民未孚師兵久戍而能追念前愆自歸本朝騰章累請遣使遜道忠惻內奮誓言外昭要質天地景情日月朕惟春秋功除之法易象復順之常嘉其自新待以殊禮況繼世維烈委質有初推顯舊勞開迪大順是用錫以典冊副之印綬今遣尙書祠部員外郎張子奭充冊禮使東頭供奉官閤門祇候延

卷十六

六

州都監張士元充副使持節冊命爲大夏國王永爲宋藩輔夫濟美莫若孝奉上莫如忠保人禁暴克綏爾功朕固不忘底定於西陲也往欽哉其光膺寵命可不慎歟仍賜御衣黃金帶銀鞍勒馬銀二萬兩絹二萬匹茶三萬斤冊以漆書竹簡賜金塗銀印文曰夏國主印約稱臣奉正朔改所賜勅書爲詔而不名許自置官屬使至京就驛買賣宴坐朵殿朝廷使至其國相見用賓客禮置樞場于保安軍及高平砦第不通青鹽子奭既行尋有詔卽所在止之候契丹使至別議十二月余靖使遼還知契丹已與夏和乃遣子奭遂事命國子博士高良夫等會夏人畫置界然朝使往止留館賓州終不復至興靈而元昊帝其國中自若也五年春二月壬辰夏國主曩霄初遣使來賀正旦自是歲以爲常詔陝西河東經略司夏國雖復稱臣其令邊臣益練毋得輒弛邊

備三月樞密副使龐籍言曩嘗已受封冊望早令延州保安軍立
定封界 夏四月夏國主曩霄初遣使來賀乾元節自是歲以爲
常閏五月丙午夏國主遣使謝冊命 秋八月癸酉詔夏國比進
誓表惟延州保安軍別定封界自餘皆如舊境其令陝西河東嚴
戒邊吏務守疆土無得輒有生事卿延經略司言夏國未肯明立
封界詔保安軍移文宥州令遵守誓約指揮 冬十月辛未始班
曆于夏國

六年春正月己丑賜夏國主詔曰向膺典冊昭啟國封方踰歲月
之周自固丹青之信忽披奏牘且覽繪圖具詳忠順之誠務爲悠
久之計爰因敷請亦盡輸陳去冬嘗有邊屬戶蕃部先沒在西界
不因招誘而歸骨肉住坐本不係逃背之人兼誓詔所不載適因
來奏更設誓條已勅邊臣自今如有逃過漢界雖係舊邊戶亦不

卷十六

七

爲容納其緣邊封境只以誓詔所載爲定其堅永好以副朕懷
夏四月甲戌賜詔曰自膺典冊已歷歲年敦守信盟確然不易朕
於君臣之義尤篤初終昨詔自今更有人民逃過漢界雖係舊屬
戶蕃部亦不容納卽當部送本處今所請欲以此一事附入前來
誓詔用以祕藏以彰悠遠朕嘉從國主之意兼所益事條已頒下
邊將遵守彼所睹聞更在嚴飭置吏勿縱侵犯安民保福以永無
窮 秋九月甲午賜詔曰嚮受冊封備觀誠節心旣傾于忠順誼
益保於悠長比閱奏函尙陳曩事斯則前皆立制已有定規然其
閒或有事理更須通曉今差尙書刑部員外郎張子奭於保安軍
計會差來人將邊界事節面更商議 冬十月丁未朔詔比遣張
子奭往延州與夏國議曩事其豐州地當全屬漢界或所議未協
聽以橫陽河外向所侵耕四十里爲禁地若猶固執卽以橫陽河

爲界初夏國既獻臥貴牓移已布等九寨又納豐州故地欲以沒
寧浪等處爲界下河東經略鄭戩言沒寧浪等處並在豐州南
深入府州之腹若如其議則麟府二州勢難以守直宜以橫陽河
爲界帝乃以戩所上地圖付子奭往議之十一月己卯遣著作佐
郎楚建中往延州同議夏國封界事以張子奭道病故也卽以建
中管勾鄭延經略司機宜時元昊納款建中數白主帥請備之乃
命建中築安定黑水等八堡以按東路之衝元昊犯邊以鄭延有
備不敢入

建中事見合璧事類
作者宗實錄疑有誤

卷十六

八

西夏紀事本末卷十六

西夏紀事本末卷十七

烏程張鑑春治甫著

甯令弒逆

慶曆八年春正月辛未夏國主曩霄殂曩霄凡五娶一日遼興平公主遼太平十一年興宗卽位以興平公主下嫁李元昊以元昊爲駙馬都尉蓋遼眞宗之姊也元昊待之甚薄因病被脫元昊亦不視之眞宗雖忿恨然亦無如之何重熙七年四月己巳遼以興平公主之薨遣北院承旨耶律庶成持詔問夏國王李元昊公主生與元昊不睦沒詰其故亦但慰問而已二日宣穆惠文皇后沒藏氏生諒祚三日憲成皇后野力氏四日妃沒咿氏五日索氏或曰曩霄凡七娶而後房所愛者不與焉一日米母氏舅女也生一子以貌類它人殺之二日索氏三日都羅氏早死四日咿迷氏生

卷十七

子阿理謀弒曩霄爲臥香乞所沈於河並殺咿迷氏五日野利氏遇乞從女也頗長有智謀曩霄畏之戴金起雲冠令它人不得冠生三子曰靈明喜方術從道士學辟穀氣忤而死次甯令哥甯令者華言大王也國語謂歡喜爲甯令亦兩岔河名也母沒藏氏從元昊出獵至此而生因以名焉曩霄以貌類已特愛之以爲太子次薛埋早死後復納沒移皆山女營天都山以居之野利之族宣言曰吾女嫁二十年止故居而得沒移女乃爲修內曩霄怒會有告遇乞兄弟謀以甯令哥娶婦之夕作亂者曩霄遂族遇乞剛浪凌城通等三家既而野利氏訴我兄弟無罪見殺曩霄悔恨下令訪遺口得遇乞妻間于三香家後與之私通野利氏覺之乃出之爲尼號密藏大師六日耶律氏七日沒藏氏爲沒藏訛喚之妹初欲爲甯令哥妻曩霄見其美自娶之號爲新皇后元昊愛之後乃

生諒祚者也甯令哥之母野利氏既怨曩霄之移愛於沒藏而甯令哥亦憤怒諒祚之母之兄沒藏訛喚者亦黠虜因勸甯令哥以弒逆之謀會野利氏欲除沒藏授戈于甯令哥使圖之甯令哥聞入曩霄之室猝與曩霄遇遂刺之不殊剗其鼻而去匿大佐沒藏訛喚家爲訛喚仆而梟之明日曩霄因鼻創死年四十六曩霄既死國人謚曰武烈皇帝廟號景宗墓曰泰陵二十五日賜夏國主賙贈詔曰詔夏國主喪葬之儀孝子之大節賙贈之禮國家之至恩眷惟忠順之邦宜厚哀榮之恤緬惟荼毒深用惻傷俾遣使車勉膺慰錫今差文思使張惟忠充弔慰使兼賜安葬故母物色具如別錄至可領也故茲詔示想宜知悉冬寒比平安好否書指不多及沒藏氏者旣娠而曩霄死乃爲尼寓於興州之戒壇院曩霄遺言立從弟委格靈令其大酋諾伊尙都等與沒藏訛喚議所立

卷十七

沒藏大族也訛喚爲之長眾欲如遺言立委格靈令沒藏訛喚獨弗許曰委格靈令非子且無功安得有國諾伊尙都曰國今無主然則何所立不然爾欲之乎爾能保有夏土則亦眾所願也訛喚曰子何敢哉夏自祖考以來父死子繼國人乃服今沒藏尼娠先王之遺腹幸而生子則可以嗣先王矣誰敢不服眾曰然遂立沒藏尼爲太后曩霄死三月而生男是爲諒祚以毛惟昌高懷正之妻更乳之而政在沒藏氏惟昌懷正皆中國人本遇乞帳下故親待之已而懷正貨銀夏人惟昌竊衣曩霄所與盤龍服皆爲訛喚所族二月夏遣使楊守素來告其主曩霄之喪時京西轉運使任顥適奏計京師乃仍命顥爲館伴顥問守素曩霄所以死守素不能對訖還不敢肆命開封府判官曹穎叔爲祭奠使六宅使鄧報信爲弔慰使賜絹布羊米麪酒如例夏亦遣使告於遼遼遣使夏